

第三二四册

明倫彙編

家範典

母子部

教子部

乳母部

嫡庶部

出繼部

(卷)

毛

禿

鬻

哭

哭

古今圖書集成

中華書局影印



古今圖書集成

卷一百一十五

欽定古今圖書集成明倫彙編家範典

第三十七卷目錄

母子部紀事七



家範典第三十七卷

母子部紀事七

明外史晉恭王欄傳簡王新塋母太妃尚氏嚴教子以禮太妃疾新塋叩頭露禱

沈德四傳洪武二十七年九月山東守臣言日照民江伯兒母病割脣肉以療不愈禱岱岳神母疾瘳願殺子以祀已果瘳竟殺其三歲兒

唐定王極傳憲王瓊烜薨莊王芝址嗣承休王芝瑱者憲王繼妃焦氏子愛之遇節且召樂婦入宮戲笑芝址詰之語不遜焦怒持鐵鎚擊宮門芝址閉不敢出妃弟璟誣王言繼母憲宗華芝址爵久之始復

襄王瞻塔傳祐材祐質皆無子從姪陽山王厚頰立厚頰事嫡母王太妃及生母潘太妃至孝潘卒殯之東偏王太妃曰汝母有子社稷是賴毋以我故避正寢厚頰泣曰臣不敢以非禮加臣母及葬跣足扶輓五十里

李德成傳德成涑水人幼喪父元末德成年甫十二隨母避寇至河濱寇騎迫母投河死德成長娶婦王

氏搏土爲父母像已與妻銜勒負載爲馬朝夕伏像側方嚴冬大雪冰堅至底德成夢母謂已曰我處冰下寒不得出覺而大慟且與妻徒跣行三百里抵河濱臥冰七日冰果融數十丈恍惚若見其母而他處堅凍如故里人相率拜懇其歸乃與俱返

張信傳信父興建文帝即位大臣薦信謀勇調北平都司受密詔令與謝貴張昺謀燕盡縛藩府人信憂懼不知所爲母怪而問之信詭以他語對母愈詰之乃告以故母大驚曰不可汝父每言王氣在燕汝無妄舉滅族

錢瑛傳瑛同時會鼎字元友泰和人元末鼎奉母避賊母被執鼎跪而泣代賊怒將殺母鼎號泣以身翼蔽傷項肩及足拯母不舍賊魁繼至憫之攜其母子入營療治獲愈

正德中流賊掠鉅鹿執趙智趙慧之母將殺之智追至跪告曰母年老願殺我慧亦至泣曰兄年長願留養母而殺我智力與爭死而母復請曰吾老當死乞畱二子羣賊笑曰皆好人也並釋之

姚珙傳姚松江人元至正中中苗帥揚完者兵入境大掠珙奉母避於野阻河不得渡母泣曰兵至吾誓不受辱遂沉於水珙急投水救之負母而出已數遇盜中矢珙佯死伏屍間以免乃奉母過湖淮兵疑從苗中來縛送渚上軍力辦始白後母病思食魚暮夜無從得家養一鳥忽飛去攫魚以歸

有祝崑者麗水人元末崑奉母避賊山中賊追及母急投崖下崑擲身赴救忽雷雨大作賊駭散一時避難者俱脫母墜深崖幾絕崑幸挂樹梢不死卒負母

而登

崔敏傳有顧琇者字季栗吳縣人洪武初父充軍鳳翔母隨行留琇視丘墓越六年聞母歿琇奔赴負母骨行數千里寢則懸之屋梁涉則戴之於頂

趙紳傳紳祥字景德永平人永樂中父亮爲松江金山衛百戶祥年十四被倭掠遂仕其國宣德中與使臣偕來上疏乞賜侍養不從其請但許給驛暫歸仍還本國祥抵金山獨其母在不能識曰果吾兒則耳陰有赤痣驗之信抱持痛哭未幾別去至日本啓以聖意國王允之仍令入貢祥乃復申前請詔許襲職歸養母子相失二十年又有華夷之限竟得遂其初志聞者異之祥事母克備甘旨母瘳疾三載朝夕不離側及卒哀毀骨立

寧獻王權傳靖王奠培嗣景泰中弋陽王奠璫許其反逆罪遇赦不治奠璫奠培弟也錦衣邊果使謂事者誣奠璫悉母英宗遺奠培書令具實以聞而遣駙馬都尉薛桓與泉泚問奠培奏無是事果按亦無實帝怒責問泉泚懼乃以爲實帝乃賜奠璫母子自盡焚其屍是日雷雨大作平地水深數尺衆咸寃之

仁宗誠孝皇后張氏傳后父兵馬副指揮麒麟仁宗立開爲后宣宗即位上尊號曰皇太后軍國大議多稟聽裁決是時海內泰寧帝入奉起居出奉遊宴四方貢獻雖微物必先上皇太后兩宮慈孝聞天下宣德三年太后遊西苑皇后皇妃侍帝親振輿登萬歲山奉觴上壽獻詩頌德又明年調長獻二陵帝親鑾轡騎導至河橋下扶輦繼民夾道拜觀陵旁老穉皆山呼迎拜太后顧曰百姓戴君以能安之耳皇帝宜重

念帝奉太后過農家召老婦問生業賜鈔幣有進蔬食酒漿者太后取以嘗帝曰此田家味也

崔鑑傳鑑京師人父嗜酒狎娼名與居娼特寵時時陵鑑母父又被酒數侵辱之一日娼惡言罵母母復之娼遂擊敗母面母不勝憤入室伏牀而泣將自盡鑑時年十二自學舍歸問之母告以故鑑曰母無死即走至學舍挾刃還娼適掃地且掃且詈鑑即拔刃刺其左脅立斃乃匿刃牖下亡走數里忽自念曰父不知我殺娼必累我母急趨歸父果訴于官將繫其母矣鑑至告捕者曰此我所為非母也衆見其幼不信鑑曰汝等不信請問凶器安在自由刃示之衆乃釋母繫鑑實獄事聞下刑部讞尚書問溫等議鑑志在救母且年少可矜難拘常律帝乃貸其罪

汪敷傳敷字仲魯婺源人元末與弟同集義旅保障鄉邑庚子秋同爲張士誠所殺授敷安慶稅令時入奏事楚寇陷城妻程負幼子淮竄山中度難兩全棄之僕後至得幼子草間顧無恙寄乳村媼逾旬子母復聚人以爲好德之報

王溥傳溥安仁人洪武元年擢河南行省平章先是溥未仕時奉其母葉避兵貴溪遇亂與母相失不知所在者凡十八年溥思母切嘗夢母若告以所在者命筆之其繇詞曰非巖非穴厥乃朽骨及是溥從容言于帝請歸省墳墓帝許之且命禮官具祭物溥歸率士卒躬詣貴溪之桃源山求之不得晝夜號泣者三日既乃得居人吳海言夫人爲賊所逼投井中死矣溥訪得井至則有風自井中出徑投溥懷中旋復入井遂汲井索之母遺尸果在溥哀呼不自勝乃具

衣冠卽其地葬之人皆稱溥孝感

榮瑄傳瑄瓊州人三歲而孤與兄瑋竝以孝聞天順四年土賊據瓊城瑄兄弟扶母走避遇賊瑋謂瑄曰我以死衛母汝急去瑄從之瑋與母遂陷賊中官軍至瑋出走被執主將將殺瑋瑄趨至叩頭流血泣請曰兄以母故陷賊母老家貧恃兄爲命願殺瑋存兄養母主將不察竟殺瑄

同時鄭諫石康人父賜舉人兄獲進士天順中母爲猺賊所掠諫年十六挺身入賊壘給之曰吾欲丐吾母豈惜金第吾幼金皆母所產願貸母歸取之賊遂拘諫而釋母然其家實無金也久之官軍至賊將解去以前語詰諫遂被殺廉州知府張岳建祠祀之葉文榮者海寧人弟殺人論死母日悲泣不食文榮患之謂母曰兄年已長有子請代弟死遂詣官服殺人罪弟得釋而文榮坐死

邵寶傳寶字國賢少孤事母至孝甫十歲母疾爲奏告天願減己算延母年終養歸嘗得疾左手不仁猶朝夕侍側不懈

景暘傳暘字伯時爲人篤於孝義母目盲百端治之不效旦夕禱於神一日母忽失故疾雙瞳炯然

姜昂傳昂字行類爲人方潔在官日市少肉供母而自食菜茹

孝肅周太后傳太后英宗妃憲宗生母也憲宗在位事太后至孝五日一朝燕饗必親太后意所欲惟恐不權至錢太后合葬裕陵太后殊難之憲宗委曲寬譬得請乃已彭澤傳澤字濟物有志節舉於鄉赴會試二場畢聞

母病徑行不待終事母喜其歸病亦速已

包節傳節字元達生五歲而孤母躬教養之舉進士爲御史爲中官廖斌詭奏詔獄永茂莊浪衛獨念其母自傷不克終養日飲泣母計至晝夜哭不已又聞弟孝卒撫膺曰誰代吾奉祀者哭益悲竟得疾不起孝字元愛後節三年舉進士爲南京御史兄弟分居南北臺並著風采又皆有至性節既服官于北不得養母孝遂以侍養歸及母亡孝哀毀骨立未終喪卒而節亦繼殞天下聞而傷之

王在復傳慈谿向叙爲諸生倭入寇以縣無城掖母出避遇賊賂叙而祈其母叙急起抱其母頸大呼曰寧殺我無殺我母賊如其言母獲全

陳經平陽人倭至負母出逃遇賊索母珥環欲殺之經平以身翼蔽賊怒揮刀截耳及肩而死手猶抱母頸不解

李文誅傳許恩斬水人夜半鄰家失火恩驚出徧尋母不得復突入遂與母俱焚

孔金傳金山陽人父早亡母謝氏遺腹三月而生金母爲大賈杜言逼娶投河死金長屢訟于官不勝言行賄欲斃金金乃乞食走闕下擊登聞鼓訴冤不得達還墓所晝夜號泣里人劉清等陳其事于府知府張守約異之召閭族媒氏質實坐言大辟未幾守約卒言實緣獲脫金復號訴不休被箠無完膚已而撫按理舊牘仍坐言大辟迄死獄中

楊通照傳通照通杰銅仁人母周氏疾兄弟爭拜禱求以身代閏三年不入內室萬曆三十六年羣苗流劫至其家母被執去二人往追之轉鬪數十里被傷

負痛不顧至鬼空溪見賊繫母大罵聲震山谷殺入重圍中爲賊所磔死

寧化民林上元賊掠其繼母李氏出城上元從城上持鎗一躍而下直奔賊壘刺死二人賊避其鋒立出李氏因引去城賴以全

孝穆紀太后傳太后憲宗妃孝宗生母也賀縣人本蠻土官女成化中征蠻俘入掖廷命守內藏時萬貴妃顯寵而妒後宮有娠者皆治使墮帝行內藏妃應對稱旨說之一幸有身萬貴妃知而恚甚令婢鉤治之婢謬報曰病瘡乃摘居安樂堂久之生孝宗使門監張敏弼焉敏驚曰上未有子奈何棄之藏之他室至五六歲帝不知也帝自悼恭太子薨數數視影躑踟成化十一年帝一日召敏櫛髮照鏡歎曰老將至而無子敏伏地曰死罪萬歲已有子也帝愕然問安在對曰奴言即死萬歲當爲子主於是太監懷恩頓首曰敏言是皇子潛養西內今已六歲矣匿不敢聞帝大喜即日幸西內遣使往迎皇子使至宣詔妃抱皇子泣曰兒去吾不得生兒見黃袍有鬚者即兒父也皇子走投帝懷帝置之膝撫視久之悲喜泣下曰我子也類我頒詔天下移妃居永壽宮數召見六月妃暴薨賜諡恭恪莊信淑妃敏懼亦吞金死孝宗既立爲皇太子時孝肅皇太后居仁壽宮語曰帝以兒付我太子遂居仁壽一日貴妃召太子食孝肅謂太子曰兒去無食也太子至貴妃賜食曰已飽進羹曰羹疑有毒貴妃大悲曰是兒數歲即如是他日魚肉我矣因恚而成疾孝宗即位追封淑妃皇太后諡孝穆慈慈恭恪莊信崇天承聖純皇后遷葬茂陵別祀

奉慈殿帝悲念太后特遣太監蔡用之賀求太后家遺修太后先塋之在賀者置守墳戶復其家擬太后父母封號於是封后父推誠宣力武臣特進光祿大夫柱國慶元伯諡端僖后母伯夫人立祠桂林府有司歲歲祀大學士尹直撰哀閒有云親漢家堯母之門增宋室仁宗之慟帝燕閒念誦輒歎流涕也張均傳張承相少孤及長爲諸生養母二十餘年以孝聞寇至負母出逃爲賊所得叩頭號泣乞免其母寇怒并殺之抱母首死

于博二歲而孤奉母盡孝寇抵城下博方讀書城中母居村舍墾下城號泣求母母已被執遇諸塗博取石奮擊寇寇就剖其心母得逸去

容偃師傳有劉靜者萬安諸生嘉靖間流賊陷其縣負母出奔遇賊將殺母靜以身翼蔽求代死賊怒攢刃殺之猶抱母不解屍閱七日不變

陳氏傳氏涇陽王生妻也有子方晬生疾將死以遺孩爲念陳曰吾當生死以之崇禎八年九月流賊至陳抱子避樓上賊燒樓陳從樓簷跳下母子俱不死賊視其色麗挾之馬上陳躍身墜地者再最後以索縛之行數里陳力斷所繫并鞍墜焉賊知不可奪乃殺之賊退家人收其屍子呱呱懷中兩手猶堅抱如故

慈聖太后蔣氏傳太后世宗母也弘治五年冊爲興王妃世宗入承大統即位三日遣使詣安陸奉迎令廷臣議推尊禮咸謂宜考孝宗而稱興王爲皇叔父妃爲皇叔母議三上不允妃至通州聞考孝宗恚曰安得以我子爲他人子留不進帝聞之涕泣啓慈壽

皇太后願避位群臣惶懼改稱興獻太后乃入後三年上尊號曰本生章聖皇太后秋母妃爲聖母章聖皇太后五年睿宗世廟成奉妃入謁七年上尊稱曰慈仁十五年上尊稱曰康靜貞壽十六年奉后幸金山謁陵命諸臣進賀行殿十七年十二月崩令議奉太后南詣合葬上尊諡曰孝慈貞順仁敬誠一安天誕聖獻皇后明年遂議南巡九卿大臣等諫帝曰朕豈空行哉爲吾母耳三月帝至承天謁獻陵作新宮四月命崔元護梓宮南附七月合葬獻陵主附睿宗廟

張清雅傳有白精忠者潁州人五歲而孤母袁氏撫之家貧母食糠覈而以精者哺兒精忠知之每餐必先啖其惡者天啓中舉于鄉崇禎八年流賊陷潁州家人勸逃匿曰母守我四十年我何忍捨去之遂遇害

有徐承德者無爲人崇禎十五年流賊突至掖其母魏氏出避母行遲爲盜所獲欲刃之承德號呼救護並遇害

潘氏傳氏海寧人年十六歸許釗生子淮甫期年釗卒既斂潘自經死已兩日矣有老嫗過之曰是可活也投之藥果甦釗族兄欲不利于孤嗾潘改適潘毀容自失其人乃夜率勢家奴僕數十人誣以負債椎門入潘負子冒風雨踰垣而逸前距大河追者迫潘號慟投于河適有木浮至憑之以渡達母家遂止不歸及准年十九始歸

崇王見深傳見深英宗第六子母仁壽皇后生于南宮天順元年封成化十年就藩汝寧故秀邸也弘治

明倫彙編家範典第三十七卷母子部

第三二四冊 之〇二葉

中皇太后春秋高思一見王帝馳救召之英宗復辟襄王奉詔來朝徐博言先皇帝奉養太后聖孝純篤臨御二十年崇府諸王未嘗輕召今即崇王奉詔來朝一慰太后願見之心欲別則難免眷戀既去必倍增憂思他日上厪聖慮所未敢言帝重違太后意不允既而言官交章及之乃已

桐城姚氏傳姚氏湘潭知縣之驥女諸生吳道震妻年十九夫亡以子德堅在襁褓忍死撫之越二十六年至崇禎末流賊掠桐城兄孫林奉母避潛山氏偕行賊奄至孫林格鬪死德堅負氏而逃氏曰事急矣汝書生焉能負我遠行儻賊追及即俱死汝不能全母顧反絕父祀乎叱之去德堅泣勿忍氏推之墜層崖下須臾賊至叱曰出金可免氏曰我流離遠道安得有金賊令解衣驗之罵曰吾生平解衣雖子婦不得在側何物賊奴敢作此語賊怒刃交下而死孫氏傳氏吳縣衛廷珪妻隨夫商販寓潯陽小江口寧王陷九江廷珪適他往所親急邀孫共逃孫謂兩女金蓮玉蓮曰我輩異鄉人汝父不在逃將安之今賊已劫鄰家矣奈何女曰生死不相離要當為父全此身耳于是母子共一長繩自束赴河死劉憲傳憲靈石諸生父先亡母年七十餘兩目俱瞽憲奉事惟謹正德六年流賊入城憲負母避之城外賊追至欲殺母憲哀告曰寧殺我母殺我母賊乃釋之羅璋遂寧諸生大盜亂蜀中母為賊所獲璋手挺長鎗連斃二賊賊舍母去後賊追至璋力捍賊使母行遠而久戰力疲竟被執賊憤甚剗心剖肝裂其屍

有李壯丁者安定縣人嘉靖中北寇入犯從父母奔避山谷遇賊縛母去壯丁取石奮擊母得脫前行復遇五賊一賊縛其母大呼曰兒速去毋顧我壯丁憤手提鐵器擊仆賊母逃得生而壯丁竟為賊所殺溫鉞大同人父景清有膽力嘉靖三年鎮兵叛殺巡撫張文錦其後巡撫蔡天祐令景清密捕首惡戮數人其黨恨之十三年復叛殺總兵李僅因逼索昔年為軍府効命者景清深匿不出遂執鉞及其母王氏以去令言景清所在逼母使言母大罵不輟賊怒支解以休鉞鉞大哭且罵并被殺事平母子並獲旌賴南叔妻蕭氏傳蕭氏萬安人夫早喪無子遺一女寇大起築室與女共居如是者數年盜突至率女持利刃遮門言曰昔寧化曾氏婦立誓殺賊舉室以守汝謂我刃不利耶犯我必殺汝賊怒縱火焚之二人咸燼

鄭謙傳鄭淵字仲涵母病逾年扶持不離頃刻跪進湯藥膝生胝既卒哀慟過節耳為之聾謝定住傳定住大同廣昌人性至孝年十二家失牛母抱幼子追逐定住隨母後虎躍出噬其母定住奮前擊之虎逸去取弟抱之扶母行虎復追母頸定住再擊之虎復去行數武虎齧母右足定住復取石亂擊虎乃舍去母子三人並全歸鉞傳鉞字汝威嘉定縣人早喪母父娶繼妻有子鉞遂失愛父偶撻鉞繼母輒索大杖與之曰母傷乃翁力也家貧食不足每炊將熟即譏數鉞過父怒而逐之其母子得飽食鉞飢困匍匐道中比歸父母相與言曰有子不居家在外作賊耳輒復杖之屢瀕於死及父卒母益擯不納因販鹽市中時私其弟問母飲食致甘鮮焉正德三年大饑母不能自活鉞涕泣奉迎母內自慚不欲往然以無所資迄從之鉞得食先母弟而已有飢色弟尋卒鉞養母終其身張氏傳張氏江都人歸史著聲年二十六而夫亡後城陷撫其子泣曰向也撫孤為難今也全節為大見其善圖吾不能顧矣遂赴水死陳伯妻黃氏傳氏江寧人年十八歸伯父死母欲改節氏苦諫不從竟他適一日母來省女閉門不與相見母慙而去宣宗恭讓皇后胡氏傳后名善祥濟寧人永樂十五年間為皇太孫妃久之為皇太子妃宣宗踐阼立為皇后后善病時孫貴妃有寵后未有子二年冬貴妃生子帝即立為太子令后上表辭位乃廢后居長安宮賜號靜慈仙師而冊貴妃為后正統七年十月太皇太后崩后痛哭不已踰年亦崩用殯御禮葬金山天順六年孫太后崩錢皇后為英宗言帝非孫太后出且胡后賢而無罪廢為仙師其歿也人畏太后殯葬皆不如禮因勸復其位號七年七月上尊諡曰恭讓誠順康穆靜慈章皇后修陵寢不附廟人終不知英宗生母誰氏也唐儼傳儼全州諸生也游學于外嫡母寢疾儼聞母疾馳歸儼事嫡母甚謹生母亦如之而儀節稍殺焉曰禮不敢踰也嫡母歿二十年而生母歿儼廬墓三年知州顧璘訪之書山之壁曰望母嚴嘉靖四年貢至京有司奏旌其門高巍傳巍母蕭有痼疾左右將奉至老無少懈母死

蔬食廬墓三年洪武中旌其孝行

師達傳達字九達東阿人少孤事母至孝年十三母疾思食藤花菜達出城南二十里求得之及歸夜二鼓道遇虎達驚呼天虎舍之去持還奉母母疾遂愈攜家至京自陳家貧母老乞一官資祿養太祖憐之以爲御史

趙和傳和字雲翰元末兵亂母抱匿林間有虎至母懼置之地虎熟視而去

楊砥傳砥字大用行太僕寺卿兼施馬寺砥篤孝行母喪哀毀未至家卒

薛均傳均行太僕寺卿以內艱去服闋猶哀毀不出居恆念母繪望雲圖題詩其上讀之輒泣下云

陳繼傳繼字嗣初吳人母吳躬績以資誦讀比長貫穿經學人呼爲陳五經奉母至孝有司上其事使御史廉之繼方隨母抱甕行灌母飲以壺漿拜而後飲帝聞而嗟異府縣交薦以母老辭不就母卒哀毀過人未樂中舉孝行仍旌其母曰貞節

林鶚傳鶚秉禮義事生母孝謹母性嚴色稍不怡必跪請得其權乃已

羅倫傳倫字彝正吉安永豐人五歲嘗隨母入園收果長幼競取倫獨賜而後受

孫燧傳燧字堪字志健歷都督僉事母楊氏至孝母年九十餘歿于京師堪年亦七十護喪歸在道以毀卒

黃潤玉傳潤玉字孟清五歲侍母疾夜不就寢

陳獻章傳獻章字公甫新會人以遺腹生家貧母林勵志鞠之性至孝朝夕不離側偶出外母有念輒心

動馳歸

劉閔傳閔字子賢莆田人生而純慤早孤婦失愛于母出之獨居奉養疾不解衣母或恚怒則整衣竟日跪榻下及母沒廬墓三年

蔡清傳清字介夫晉江人成進士即乞假歸講學于僧寺一日爲母寫真母慨然曰吾聞母以子貴汝舉進士有年矣吾猶故服耶清聞言涕下即赴選得禮部祠祭主事

易時中傳時中字嘉會晉江人遷順天府推官念母遂以終養歸母年九十一而終時中年七十矣毀不勝喪宗黨稱孝焉

林光傳光字緝熙東莞人舉成化元年鄉試父喪既除母強之仕二十年始以會試一榜除平湖教諭改充州教授以母年高乞近地便養吏部不許未踰年而母卒

汪視傳視字介夫祁門人周歲而孤母廖氏抗節育之視奉母孝敬備至嘉靖九年以侍母疾過勞得疾遽卒年四十有一

何屋傳屋字朝舉江西新城人遺腹生母愛之不欲煩以學乃夜藏燈動讀不懈母卒哀毀幾不能生疾且劇所親持肉羹往食之曰聊以助氣母減性哽咽不能下竟却去葬時霜重冰膠徒跣行十餘里足破流血不止廬墓三年乃返

范確傳確字廷潤會稽人家無旦夕儲諷誦自若幼孤奉母盡孝授徒他家遇時物則慨然曰吾母安得嘗此輒投箸不食既歿執喪毀瘠母嗜芋終身不食芋

張基傳基字德載吳縣人祖母及妻相繼卒嘆曰母老矣誰與晨夕自是跣步不離屏去冠服爲野人裝治一室題曰愛日以居母飲食滯澀非親調不進奉母外足不踰戶年五十九預知當死一夕候母安者十餘昧爽跌坐遂卒

呂潛傳潛字時見涇陽人母病革欲識其婦面命之娶潛娶而不婚三年喪畢然後入室

馮子威傳子威字受甫少孤事母孝母疾不解衣者逾年沒而哀毀骨立氣息僅屬

杜瓊傳瓊字用嘉吳縣人生而孤育于母稍長事母至孝有司欲以上聞瓊辭之而請旌其母母遂獲旌嘗割股愈母疾祕不令人知

沈周傳周字啓南長洲相城里人也內行醇謹奉親至孝父歿有勤之仕者對曰若不知母氏以我爲命耶奈何干升斗之祿遠離膝下也母與鄰媼歎媼家被火無所棲母以爲念周亟延與母居晨夕奉之若母母乃大喜周以母故終身不遠遊母年九十九而終周亦八十矣

劉球傳球字德又永樂十六年會試第一授編修母老乞歸母病思食鱸魚非其時矣璘禱于神舉網得二尾以奉母母病尋愈

丘溶傳溶字仲深幼孤母李氏教之讀書過目輒成誦

陳茂烈傳茂烈字時周幼孤勵志讀書舉弘治九年進士十六年授御史尋以母老乞終養歸力供甘旨身治畦正德五年吏部以茂烈養母清貧奏授晉江教諭資其祿茂烈辭不赴既而奏給月廩詔月給米

三石復辭詔不許茂烈以母老未有嗣息日夜為憂方抱疾而母卒強起號哭寢地疾轉亟遂卒

黃佐傳佐字才伯除江西僉事聞母病引疾乞休不俟報竟去下巡撫林富逮問富言佐誠有罪第為親受過于情可原乃令致仕

宋景傳景字以賢補浙江僉事甫數月聞母病棄官歸母卒哀毀絕勺水者五日

查鐸傳鐸涇縣人同邑張榮五歲受書輒曉大義常聞難聲遽欲起母問之則舉小學以對母笑曰纔讀書便曉其義邪應曰兒願為之豈直曉之而已

李遷傳遷字子安新建人性純孝砥行廉介舉嘉靖二十年進士有薦入翰林者弗就乞出使便道觀省都御史熊浹嘆曰謝清華以成素志可謂孝矣遂奉

昭聖太后哀詔使滇蜀所至却餽比還乞就南以便養授南京車駕主事歷加南京刑部尚書不拜以病歸文武將吏有遺之金卻之曰今藉主恩歸里有賜金奉母足矣時遷已近七十母尚無恙母終廬墓

彭程傳程字萬里弘治五年巡視光祿上言付刑部定罪及朝審并家屬戍程母李氏年老無他子叩闕乞畱程侍養南京給事中毛珵等奏曰昔劉禹錫附

王叔文當竄遠方裴度以其母老為請得改連州祈少賜矜憐全其母子不許明年帝終念程母老放還海瑞傳瑞字汝賢還淳安知縣布袍脫粟令老僕藝蔬自給遇母生日始市肉總督胡宗憲聞之曰海淳

安非母壽肯肉耶王之誥傳之誥字告若神宗即位拜刑部尚書萬曆三年遂乞假送母歸是時居正母在家詔中使將護

既抵都下帝與兩宮各遣使郊勞賜資疊至鄉人艷稱之而之誥奉母里居觴酒豆肉質儉如儒素身已垂白孺慕無改後居正死家被籍其母給開房廢地以養而之誥猶侍其母無恙及母終之誥亦篤老不更仕而卒

張烈婦傳婦政和游銓妻倭入寇所至淫掠婦數語其女曰婦道惟節是尚值變之窮有溺與刃耳汝謹識之銓以為不祥婦曰使婦與女能如此祥孰大焉未幾賊陷政和張度不能脫連呼女曰省前誨乎女

領之即赴井張含笑隨之竝死饒伸傳伸字抑之累官刑部侍郎魏忠賢亂政告歸兄位累官工部右侍郎時母年百歲與伸先後以侍養歸一時謂為盛事

鄧以讚傳以讚字汝德萬曆十七年詔起中允管司業事行至中途復以念母返以讚登第二十餘年在官僅滿一考居母憂不勝喪而卒

張元忬字子盡生有異質好讀書素羸弱母戒無過勞乃藏燈幕中俟母寢始誦萬曆十年奉使楚府還過家省母既行心動輒馳歸僅五日母卒

梁策傳策鄆陵人性至孝七歲母篤疾晨夕焚香泣中庭請以身代持香謁城隍神伏哭幾絕忽見黃冠授藥一莖令煎湯飲母飲之過愈亦不知為何藥也

張棟傳棟字伯任崑山人早孤家貧與弟文柱勤苦自奮事母皆以孝聞及母卒棟年已六十毀瘠骨立既葬廬墓已而疾作醫者勸進酒食暫歸居室棟不

可竟卒於墓次文柱舉人母性嚴稍拂意輒面壁竟日文柱侍立不去已而色解乃已

馬如蛟傳黎弘業字孟擴順德人由舉人授和州知州賊初至禦却之其冬賊復至城將陷弘業繫印於肘跪告其母曰兒不肖貪微官以累母奈何母李氏泣諭曰汝勿以我為意事至此有死而已遂自縊弘業北面慟哭再拜自刎

高岱傳傳日燭字中黃諸暨人為諸生與族父平公同受業劉宗周江上師潰兩人相謂曰吾輩義當死但各有母在母許之死乃可死爾平公曰於母母不許日燭曰於母母許之乃赴池死平公養其母終身

陳預抱傳預抱舞陽人母段早寡撫預抱及其弟預養預懷皆為諸生三子亦力田好學善承母志崇禎十四年流寇陷舞陽其母先赴井三子從之預抱婦黃氏攜其子默遁預養婦馬氏攜其子默恆默言亦

從之三世人一時盡節天下多之衛景瑗傳景瑗字仲玉韓城人巡撫大同李自成犯山西總兵姜瓖迎賊景瑗為賊所執賊使景瑗母勸降曰母今年八十餘當自為計兒為國大臣不可不死母出景瑗謂人曰吾不罵賊者以全母也自縊於

僧寺賊歎為忠臣移其妻子於空舍戒母犯王賓傳賓字仲光長洲人奉母至孝知府姚善賢而造之賓隔門語曰勿驚老母遂踰牆逸去年七十疾革抱母不釋已死復蘇連呼其母乃絕葬後室中夜半聞呼母聲母曰我在此答曰兒捨母不得如是數聲母慟哭久之始息

唐豫傳豫廣東順德人子璧有文行母瞽不能自食璧晨夕飲食之一時搢紳欲薦之以母老無兄弟為辭

唐豫傳豫廣東順德人子璧有文行母瞽不能自食璧晨夕飲食之一時搢紳欲薦之以母老無兄弟為辭

唐豫傳豫廣東順德人子璧有文行母瞽不能自食璧晨夕飲食之一時搢紳欲薦之以母老無兄弟為辭

張宗魯傳宗魯鈞州人四歲失明年二十遭亂負母路氏逃難其妻扶掖以行咸饑宗魯賣卜以爲養日給不足妻採野菜以繼之事平宗魯奉母還故鄉竭力供養母卒仍求其前母曹氏沈氏遺骸合葬父墓洪武十七年禮部以警子而有孝行請表其門從之孝定李太后傳太后穆宗妃神宗生母也鄒縣人初爲宮嬪進貴妃生神宗進皇貴妃萬曆元年上徵稱曰慈聖皇太后大學士張居正請太后護視帝乃徙居乾清帝或不讀書即召使長跪每御講筵入常令效講臣進講於前當朝五更至帝寢所呼曰帝起帝嘗在西城曲宴慈寧兩內侍令歌新聲辭不能帝醉怒取劍擊之爲諸奄所解戲割其髮翊日太后傳語閣臣召帝長跪后性慈惻好佛天下名勝地多置梵剎動費鉅萬帝亦助施無算初光宗未冊立給事中姜應麟等請立東宮被謫太后聞之弗善也一日帝入侍太后問其故帝曰彼都人子也內廷呼宮人曰都人太后亦由宮人進遂大怒曰爾亦都人子帝伏地不敢起御史曹學程以建言論死太后憐其母老言於帝釋學程

神宗孝端皇后王氏傳后餘姚人性端謹光宗在東宮危疑者數矣調護備至鄭貴妃寵寵后不較也正位中宮者四十年以慈孝稱

孝靖王太后傳太后神宗妃光宗生母也太后初爲慈寧宮宮人年長矣帝過慈寧私幸之有身十年八月光宗生是爲皇長子既而鄭貴妃生皇三子進封皇貴妃而后不封光宗每至后宮鄭貴妃即使人伺焉四十年病薨光宗至宮門猶閉挾鑰而入后目眚

手光宗衣而泣曰兒長大如此我死何恨遂薨

楊成章傳成章道州人父泰爲浙江長亭巡檢以妻何氏無所出納丁氏女爲妾生成章泰卒成章甫四歲何將扶輿歸丁氏父予之子而奪其母母乃剪銀錢與何別約各藏其半俟成章長授之越六年何臨歿授成章半錢告之故成章嗚咽受命既冠娶婦月餘即執半錢往浙中尋母母先已適東陽郭氏生子日珉而成章不知也徧訪之無所遇而還弘治十一年東陽典史李紹裔以事宿珉家珉母知爲道州人遣珉問成章存否知成章已爲諸生乃令珉執半錢覓其兄會有會稽人官訓導者嘗設教東陽爲珉師與成章述珉母憶子狀成章亦在尋母遇珉於江西舟次兄弟悲且喜各出半錢合之益信遂俱至東陽母子始相聚自是成章三往迎母不遂棄月廩赴東陽侍養及母卒廬墓三載始返

何士晉傳士晉宜興人父其孝得士晉晚族子利其賞結黨致之死繼母吳氏匿士晉外家士晉讀書每懈母輒示以父血衣士晉感厲與人言未嘗有笑客萬曆二十六年既舉進士持血衣懇之官罪人皆抵法

劉宗周傳宗周字起東山陰人以遺腹生家酷貧母章氏育之於外家年二十四舉萬曆二十九年進士即遭母憂爲室中門之外日哭泣其中鄉人陶望齡品之曰世衰禮廢未見善喪若劉子者王章傳章字漢臣武進人授諸暨知縣章少孤母訓之素嚴及是祖帳歸少暮母訶跪予杖曰朝廷以百里授酒人乎章伏地不敢仰視親友力解乃已

張繼孟傳張獻忠寇成都陳孔教字魯生會稽人舉於鄉歷官四川按察僉事至是不屈死子以衡奉母孔氏南竄孔教死匿不使知踰年母詣以衡書室見副使周夢尹請孔教卹典疏哀號隕地罵以衡曰父死已二載我尚偷生不肖子使我無顏見汝父地下遂取刀斷喉死

孝純劉太后傳太后光宗妃莊烈帝生母也初入宮爲淑女萬曆三十八年十二月生莊烈愍皇帝已失光宗意被譴薨光宗中悔恐神宗知之戒掖廷勿言葬於西山及莊烈帝封信王進賢妃天啓中莊烈帝居助勤宮問近侍曰西山有申懿王墳乎曰有傍有劉娘墳墳乎曰有每密付金錢往祭及即位上尊諡曰孝純恭懿淑穆莊靜毗天毓聖皇太后還葬慶陵帝五歲失太后問左右遺像莫能得傳懿妃自稱習太后言宮人中狀貌有相類者命太后母瀛國太夫人徐氏指示畫工可意得也圖成由正陽門具法駕迎入帝跪迓於午門懸之宮中呼老宮婢視之或言似或曰否帝爲雨泣妃以此得加封號

王亭縣君傳縣君伊府宗室典柄之女年二十四適楊初不兩月初卒有遺孕乃忍死襄事及生男家日落萬曆二十一年河南大饑宗祿久缺紡績三日不得一餐語孤曰昔所以忍死者以汝未成立爾今汝年二十有五值此凶饑五日三飯情何以堪我其死矣母子慟哭夜分夢神語曰汝節行上聞於天當有以相助晨與母子述所夢皆符頗怪之縣君素令子取屋後土作坏易粟其日掘土得錢數百自是每掘輒得錢一日舍旁地陷得石炭一窖取以供爨延兩

月餘官俸亦至

和州萬氏傳萬氏儒士姚守中妻泉州知府慶女孫也生六子皆有室崇禎八年流賊陷其城慟哭曰我等女子也誓必死節見諸子環泣急麾之曰汝輩男子當圖存宗祀何泣為長子承舜泣曰兒讀書惟識忠孝字耳願為厲鬼殺賊何忍母獨死遂負母投於塘

鄖陽宋氏傳宋氏諸生陳丹餘妻崇禎六年賊至被掠并執其女迫令入空室適屋前有古槐母女抱樹立罵賊曰吾母子死白曰下耳豈受汚暗室中乎大罵不行賊斷其手益大罵俱被害

大興張氏傳張氏商丘知縣梁以樟妻崇禎十五年流賊圍商丘急婦積薪樓下集婢女其上俱令就燄謂子變曰汝父城守命不可知宗祀惟汝是賴屬其乳媪往匿民家自縊死家人舉火諸屍俱燼

丘緒傳緒字繼先鄞縣諸生也生母黃為嫡余所逐適江東包氏未幾轉適他所遂不復相聞緒年十五父歿事余至孝余疾謹奉湯藥不解衣帶者數月余重感其孝病革與訣曰我即死汝無忘若母當是時距其生母被逐已二十年矣一夕夢人告曰若母在台州金鰲寺前覺而忘之次明與一人憩於途詰之則包氏故義馬廐也叩以母所向曰有周平者曾悉其事今已戍京衛矣緒姊婿謁選在京遺書囑訪平久之未得一日有避雨於邸門者其聲類鄞人叩之即周平也言黃已適台州李副使子緒得報即之台而李已歿其嗣子漫不知前事緒徬徨掩泣於道有傷之者導謁老嫗灼王四知黃已轉適仙居吳義官

吳仙居巨族也緒至歷闕數十家無所遇已而抵一儒生吳秉朗家語之故生感其意留止焉有婦氏聞所留者異鄉人也悲而吟之生告以緒意婦即黃故主母也頗憶前事然不詳所往呼舊蒼頭問之云金鰲寺前去歲經之棺已殯寺旁矣緒以其言與夢合信之行且泣道遺一牛觸墜於溝則與夫馬長之門也駭而出問所從來緒以情告長曰吾前與一婦至縉雲蒼嶺下殆是也與緒至其處緒徧物色無所遇偃偃行委巷中忽一媼立門首探之知為鄞人告以所從來媼亦轉詢丘氏耗則緒母也抱持而哭閭里皆感動寺旁棺者蓋其妣氏云所適陳翁貧而無子且多負緒還取金償之并迎翁以歸備極孝養知縣趙民順入覲疏聞於朝獲旌表

雪濤談叢成化間華亭縣民某其母再醮生一子及母死二子爭葬質之官縣判其詞曰生前再醮殊無戀子之心死後歸墳難見先夫之面令後子收葬噫判詞確則確矣得無傷前子之心乎有母而爭葬焉不失為孝較諸互相推諉者此殆可嘉而竟拂其志令共葬焉可也但不必合於前夫之塚耳

近峰記略劉太卿謄言英宗土木之難幾不免矣也先之母告其子曰吾蘇州人也少隨夫戍邊被汝父擄回與之生汝吾念昔居中國為今天子臣臣無殺君之禮跪且泣以請也先從之英宗得還此說不見記載太卿掌詔勅在內閣四十餘年其必有所授之也

寓園雜記劉忠愍公球為侍講奏宦官王振專權振命錦衣指揮馬順夜殺公於獄中二子鈺鈺號哭求

屍止得一臂鈺鈺痛公之死終振之世不出歸葬後皆以進士為京官同擢官閩浙二藩母夫人尚無恙兩地奉迎供養極厚人爭羨之此天之報忠也

志怪錄丘傑年十四遭母喪以熟菜有味不嘗於口歲餘忽夢母曰汝啖生菜遇蝦蟆毒靈牀前有三丸藥可取服之僕驚起果得藥服之下科斗子數升翦勝野聞代王之母邠人也先是太祖嘗戰敗而奔投王母家王母曰汝朱某耶人言汝當為天子也因留之宿及旦辭去王母曰吾後有娠如何帝乃貽敵梳為質王母亦以匣中裝贈行自是果娠及太祖即位子且長矣王母攜其子及質物上謁帝令工部草創木宇居之不令入宮及代府既成遂分封焉故王卒得終養其母踰於常制

明語林廖庭皓母採蔬於圃遇虎皓自田來急追及抱虎項且泣且訴願以身代虎不願以拳入虎口母遂得脫

虎奮章惠仲與妹婿丘生偕赴試出峽舟覆丘死焉章登第調并研主簿還至峽聞弟死舍舟乘馬疾行過萬州日黑馬仆墜崖下虎來銜章髮章謂虎曰汝靈物當聽吾語吾母八十生子二人女一人往年妹婿死于江今年弟死于室獨吾一身存將竊升斗祿養母汝食我奈母老何虎聞遽捨之天明章攀木而上乃得歸章赴官母卒未幾亦卒乃知一念之善脫于虎口為母故也

見聞錄太原王相公始生冷無氣母驚謂已死有鄰姬徐氏者反覆諦視良久笑曰此俗名臥胞生吾能治之當活活則富貴但不免多病累阿母耳趣使治

之其法用左手掬兒右手摺其背百餘遍時噉下而醒六歲中痘公母嘗下樓謁巫見一白衣人長丈餘圍立凝視若有所言母驚踣樓下以爲不祥然竟無恙從父入太學僦舍十廟前甫四歲苦夜啼雖風雨大寒中必求宿戶外母患之試使人詐蒙虎皮升屋而嗥夜夜爲常迄不能禁忽一夕有真虎自牆東緣脊而來其行甚遲睥睨若欲下瞰者比舍人俱見之一市盡闕持挺杖逐之迤邐至西牆而沒公能記其狀方額翹尾視常虎更大而黑無斑文有識者言此神司虎也

枝山前聞吾邑之相城有一乞兒姓沈年在中歲每詣沈隱君孟淵所請丐凡所得多不食而分貯之筒篋中隱君初不爲意久而問焉則曰將以遺老娘耳隱君始異之潛令人偵其所爲丐至一岸旁坐地出簞中飲食整理之擎至船邊船雖陋而甚潔老嫗坐其中丐登舟陳食母前傾酒跪而奉之伺母接杯乃起跳舞而唱山歌作嬉笑以樂母母殊意安之也必母食盡乃更他求若無得則自受餒終不先食也日如之凡數年母死丐始不見隱君歎詫亦時少周之此非有所爲而爲可謂真孝矣

虞初新志天順間恩縣人趙雲性至孝母劉病篤聞懷慶府濟源廟神有靈藥誠求可得雲往求之越二日水中涌出一絹囊內盛絳桃花片約二升許持歸煎湯奉母疾果愈其餘愈疾又十餘人

趙希乾傳希乾南豐東門人幼喪父以織布爲業年十七母抱病月餘日夜祈禱身代不少愈往問吉凶于日者日者推測素驗言母命無生理又往卜於市

占者復言不吉希乾踟躕不去曰何以救母病占者惡其煩數曰汝母病必不治若欲求愈無乃割心救之耶希乾歸侍母左右見病益危篤時日光斜射在席形影子立寂寂旁無一人希乾忽起去筒中得雞髮小刀立於廳外剖臂深寸餘以手入取其心不可得忽風聲震颶門戶胥動以爲有人至四顧周章急取得腸抽出割數寸蓋人驚則心上冲腸盤旋滿胃腹云希乾置腸於釜上僭仆就室而臥頃刻母姑來視病見釜上物以爲希乾股肉也烹而進之母再視希乾則血淋漓心腹間不能出聲始知希乾爲割心矣城邑喧然傳其事聞於令令親往視之命內外醫調治母子病不數日母病愈旬日希乾亦漸次進飲食胃前腸出不得納每日子午間囊滴瀝下月餘後希乾起無恙終身矢從臂上出趙氏故宋裔爲南豐巨族宗黨以爲奇孝供贍其母子而更教之讀書學使者侯峒曾聞其事取充博士弟子員崇禎壬午以恩詔天下學選一人貢於成均學使者吳石渠既考試畢進諸生而告之曰百行以孝爲先趙希乾割心救母不死不可以尋常論建武多才校士衡文希乾不應入選今欲諸生讓貢希乾以示獎勵諸生咸頓首悅服于是以希乾選補壬午恩貢又三四年而有甲申乙酉之變希乾避亂山中將母不遑遂賣卜奔走於四方以養其母又十餘年母壽八十餘而卒自是希乾少家居母死未十年而希乾亦卒年六十一

欽定古今圖書集成明倫彙編家範典

第三十八卷目錄

母子部雜錄

母子部外編

家範典第三十八卷

母子部雜錄

易經說卦坤地也故稱乎母又坤爲母

詩經王風葛藟篇終遠兄弟謂他人母謂他人母亦莫我有

魏風陟岵篇陟彼岵兮瞻望母兮母曰嗟予季行役

季少子也尤憐愛少子者婦人之情也

小雅四牡篇王事靡盬不遑將母

是用作歌將母來諗以其不獲養父母之情而來

告于君也

魯頌閟宮篇魯侯燕喜令妻壽母壽母壽考之母

也

禮記檀弓二名不偏諱夫子之母名徵在言在不言

徵言徵不言在

郊特性婦人者從人者也幼從父兄嫁從夫夫死從

子

表記今父之親子也親賢而下無能母之親子也賢

則親之無能則憐之母親而不尊父尊而不親

左傳母覆之

孝經母取其愛

管子形勢解篇棟生桄不勝任則屋覆而人不怨者其理然也弱子慈母之所愛也不以其理動者下瓦則慈母咎之故以其理動者雖覆屋不爲怨不以其理動者下瓦必咎故曰生棟覆屋怨怒不及弱子行天道出公理則遠者自親廢天道行私爲則子母相怨故曰天道之極遠者自親人事之起近親造怨戰國策夫學子之相似者惟其母知之而已

老子道德經下篇天下有始以爲天下母既得其母以知其子既知其子復守其母沒身不殆

淮南子說山訓曾子立孝不過勝母之門

方言凡草生而初達青齊兌翼之間謂之芟故傳曰慈母之怒子也雖折芟芟之其惠存焉

晉陸機思親賦悲桑梓之悠曠愧燕喜之弗營指南雲以寄款望歸風而効誠年歲俄其聿暮明星爛而

將清迴飆肅以長赴零雪紛其下頽羨纖枝之在幹

悼落葉之去枝存顧復之遺志感明發之所懷居辭

安而厭苦養引約而摧豐忘天命之晚暮願鞠子之

速融兄瓊芳而蕙茂弟蘭發而玉暉感魂委之晚就

痛慈景之先違天步悠長人道短矣異途同歸無早

晚矣

潘岳閒居賦序太夫人在堂有羸老之病尚何能違

膝下色養而眉眉從斗筭之役乎於是覽止足之分

庶浮雲之志築室種樹逍遙自得池沼足以漁釣春

稅足以代耕灌園粥蔬以供朝夕之膳牧羊酤酪以

俟伏臘之費乃作賦曰凜秋暑退熙春寒往微雨新

晴六合清明太夫人乃御板輿升輕軒遠覽王畿近周家園席長筵列孫子柳垂陰車結軌或宴於林或

禊於汜昆弟班白兒童羣齒稱萬壽以獻觴或一懼

而一喜壽觴舉慈顏和浮杯樂飲絲竹駢羅頓足起

舞抗音高歌人生安樂孰知其他

左九嬪孟軻母贊鄒母善導三徙成教鄰止庠序俎

豆是效斷織激子廣以墳與聰達知禮敷述聖道

魯敬姜贊邈矣敬姜含德之英於行則高於理斯明

垂訓於宋厲發奇聲宣尼三歎萬代遺聲

鈕滔母序贊夫人姓公孫氏會稽人也資三靈之淳

懿誕華宗之澄粹奇朗昭于齡軌四教成于弱弄慈

惠溫恭行有秋霜之潔祇心制節性同青春之和敦

悅憲章動遵禮規居室則道齊師氏有行則德配女

儀禮服有盈籩豆無闕荷蟻夫人天資特挺行高冰

潔操與霜整性揚蘭芳德振玉穎荷彼瓊林奇翰有

集展彼碩媛含德訓二動與禮游靜以義立

韓愈誰氏子詩非癡非狂誰氏子去入王屋稱道士

白頭老母遮門啼挽斷衫袖留不住

風璞俗說母之望于曰倚門按戰國策王孫賈事閔

王王走失王之處其母曰女朝出而晚來則吾倚門

而望女暮出而不還則吾倚閭而望朝暮之出入固

可言倚門若出稍久當言倚閭蓋門不可久倚故也

今人但用倚門事豈以暮出不還爲俗忌邪

野客叢談今人稱母爲北堂蓋祖毛詩伯兮詩焉得諶草言樹之背按註諶草令人忘憂背北堂也其意謂君子爲王前驅時過不返家人思念之切安得諶草種於北堂以忘其憂蓋北堂幽陰之地可以種

萱初未嘗言母也不知何以遂相承爲母事借謂北堂居幽陰之地則凡婦人皆可以言北堂矣何獨母哉傳注之學失先王三百篇之旨似此甚多

燕翼貽謀錄仁宗景祐三年九月集賢校理郭稷乞爲嫁母服詔兩制御史太常寺禮院議詔自今並許解官申心喪

東軒筆錄易曰家人有嚴君父母之謂也范滂與母別曰唯願大人割愛是母亦可稱嚴君大人也

劉基書劉禹疇行孝傳後浮屠謂婦人之育子者必有大罪故兒女子尤篤信其說以致恩於其母吾不知司是獄者爲誰人必有母將舍其母而獄人之母歟將併與其母而獄之歟獄其母不孝舍其母而獄人之母不公不公俱不可以令二者必居一焉將見羣起而攻之矣雖有獄誰與治之

歸有園慶談孩提之童無不知愛其親似矣假令易乳而食能自識其親母乎

寡婦之子難馴多因姑息

採蘭雜志昔有母子離別母每見蟪蛄垂絲著衣則曰子必至也果然故名曰喜子子思其母亦然故號曰喜母均之一物也

日知錄人臣對君稱父爲先臣則亦可稱母爲先妾左傳晏嬰辭齊景公曰君之先臣容焉戰國策匡章對齊威王曰臣非不能更葬先妾也陳沈炯表言臣母妾劉年八十有一臣叔妾丘七十有五

母子部外編

呂氏春秋孝行覽有仇氏女子採桑得嬰兒於空桑之中獻之其君其君令婦人養之察其所以然曰其母居伊水之上孕夢有神告之曰曰出水而東走母顧明日視曰出水告其鄰東走十里而顧其邑盡爲水身因化爲空桑故命之曰伊尹此伊尹生空桑之故也

異苑刻縣陳務妻少與二子寡居好飲茶茗宅中先有古塚每日作茗飲先輒祀之二子患之曰古塚何知徒以勞祀欲掘去之母苦禁而止及夜母夢一人曰吾止此塚二百餘年謬蒙惠澤卿二子恆欲見毀賴相保護又響吾佳茗雖泉壤朽骨豈忘翳桑之報遂覺明日晨興乃於庭內獲錢十萬似久埋者而貴皆新提還告其兒兒並有慙色從是禱辭愈至

義熙中高平檀茂崇喪亡其母沛郡劉氏晝眠夢見崇手執團扇云崇年命未盡橫被災厲上末違離今以此扇奉別母流涕驚覺果於屏風間得扇上皆如蜘蛛網絡撫執悲慟

還冤記宋東海徐某甲前妻許氏生一男名鐵白而許氏亡甲改娶陳氏陳氏凶虐志滅鐵白陳氏產一男生而呪之曰汝若不除鐵白非吾子也因名之曰鐵杵欲以杵擣鐵白也於是捶打鐵白備諸苦毒飢不給食寒不加絮甲性懦弱又多不在舍後妻恣意行其暴酷鐵白竟以凍餓被杖而死時年十六亡後旬餘鬼忽還家登陳牀曰我鐵白也實無片罪橫見殘害我母訴怨於天今得天曹符來取鐵杵當令鐵杵病與我遭苦時同將去自有期日我今停此待之

聲如生時家人賓客不見其形皆聞其語於是恆在屋梁上住陳氏跪謝搏頰爲設祭奠鬼云不須如此餓我令死豈是一餐所能酬謝陳夜中竊語道之鬼厲聲曰何敢道我今當斷汝屋棟便聞鋸聲屑亦隨落拉然有響如棟折崩舉家走出炳燭照之亦了無異鬼又罵鐵杵曰汝既殺我安坐宅上以爲快也當燒汝屋即見火然烟焰大猛內外俱損俄爾自滅茅茨儼然不見虧損日日罵詈時復歌云桃李花嚴霜落奈何桃李嚴霜早已落聲甚傷切似是自悼不得長成也於是鐵杵六歲鬼至使病體痛腹大上氣妨食鬼屢打之打處青瘀月餘而死其鬼便寂然無聞

吳均春秋南齊晉安王蕭子懋字雲昌武帝之子也始年七歲阮淑媛嘗病危篤請僧行道有獻蓮花供養佛者衆僧以銅甕盛水浸其花莖欲令不萎如此三日而花更鮮子懋流涕禮佛誓曰若使阿姊因此勝利願佛之力令花竟齊不萎七日齋畢花更鮮紅看視甕中稍有根鬚母病尋差當代稱其孝感也子懋弟南海王子罕字靈華其母樂容華寢疾子罕晝夜禮拜於時以竹爲燈續其燈照耀訖夜極明此竹經宿枝葉茂盛母病尋愈

冤魂志漢王如意漢高帝第四子也呂后生長子盈立爲皇太子而如意母戚夫人得寵於帝帝欲替太子而立如意羣臣爭之故遂封如意於趙呂后以是嫉之及高帝崩呂后候如意到長安而拉殺之又支斷戚夫人手足號爲人彘後呂后祓除於灊上還道中見物如蒼狗攫后腋忽而不見上之云趙王如意

為祟遂病腋傷而崩

宋瑯琊諸葛覆宋末嘉年為元真太守家累悉在揚都唯將長子元崇送職覆於郡病亡元崇年始十九送喪欲還覆門生何法僧貪其資貨與伴共推元崇墮水而死因分其財爾夜元崇母陳氏夢元崇還具叙亡父事及身被殺委曲髣髴流漂怨酷無雙違奉累載一旦長辭銜悲如恨如何可說歎歎不能自勝又云行速疲極困臥廳下牀上以頭枕廳母視兒眼處足知非虛矣陳氏悲恒驚起把火照兒眼處沾濕猶如人形於是舉家號泣便如問於時徐森之始除交州徐道立為長史道立即陳氏從姑兒也具疏言所夢託二徐檢之二徐道遇諸葛喪船驗其父子亡日如鬼語乃收其行兒二人即皆款服依法殺之更差人送喪達都

冥祥記董青建者晉人也父字賢明建元初為越騎校尉初建母宗氏孕建時夢有人語云爾必生男體上當有青誌可名為青建及生如言即名焉有容止美言笑性理寬和家人未嘗觀其慍色見者咸異之至年十四而州迎主簿建元初皇儲鎮樊漢為水曹參軍二年七月十六日癡疾自云必不振濟至十八日臨盡起坐謂母曰罪盡福至緣累未絕願母自割不須憂念因出聲大哭聲盡而絕將殯喪齋前其夜靈語云生死道乖勿安齋前自當有造像道人來迎喪者明日果有道人來名曇順即依靈語向曇順說之曇順曰貧道住在南林寺造丈八像垂成賢子乃有此感應寺西有少空地可得安喪也遂葬寺邊三日其母將親表十許人墓所致祭於墓東見建如生

云願母割哀還去建今還在寺住母即止哭而還舉家菜食長齋

晉瑯琊王凝之妻左將軍夫人謝氏奕之女也嘗頻亡二男悼惜過甚哭泣累年若居至艱後忽見二兒俱還皆著鎖械慰勉其母宜自寬割兒並有罪若垂哀憐可為作福於是哀痛稍止而勤功德

宋袁廓字思度陳郡人也元微中為吳郡丞病經少日奄然如死但餘息未盡棺舍之具並備待畢而殮三日而能轉動視瞬自說云有使者稱教喚廓隨去既至有大城池樓堞高整階閣崇麗既命廓進次有一屋見其所生母羊氏在此屋中容服不佳甚異平生見廓驚喜戶邊有一人身面傷痍形類甚異呼廓語廓驚問其誰羊氏謂廓曰此王夫人汝不識耶王夫人曰吾在世時不信報應雖復無甚餘罪正坐鞭撻婢僕過苦故受此罰亡來楚毒殆無暫休今特少時寬隙耳前喚汝姊來望以自代竟無所益徒為憂聚言畢涕泗王夫人即廓嫡母也廓姊時亦在其側有頃使人復將廓去經涉巷陌閭里正頓似是民居未有一宅竹籬茅屋見父披被著巾凭案而坐廓入門父揚手遣廓曰汝既蒙罷可速歸去不須來也廓跪辭而歸使人送廓至家而去廓今太子洗馬是也冥報拾遺唐京都市北店有王會師者其母先終服制已畢至顯慶二年內其家乃產一青黃母狗會師妻為其盜食乃以杖擊之數下狗遂作人語曰我是汝姑新婦杖我大錯我為嚴酷家人過甚遂得此報今既被打羞向汝家因即走出會師聞而涕泣抱以歸家而復還去凡經四五會師見其意止乃屈請

市北大街中正是己店北大牆後作小舍安置每日送食市人及行客就觀者極眾投餅與者不可勝數此犬恆不離此舍過齋時而不肯食經一二歲莫知所之

唐居士李信者并州文水縣之太平里人也身為隆政府衛士至顯慶年冬隨例往朔州赴蕃乘赤馬一匹并將草駒是時歲晚嚴陰風雪嚴厚行十數里馬遂不進信以蕃期期逼促提之數十下馬遂作人語謂信曰我是汝母為生平避汝父將石餘米之女故獲此報此駒即是汝妹也以力償債向子汝復何苦敦逼如是信聞之驚愕流涕不能自勝乃拜謝之躬駝鞍轡謂曰若是信嫌當自行歸家馬遂前行信負鞍轡隨之至家信兄弟等見之悲哀相對別為廐養飼有同事母

唐汾州隰城人劉善經少孤為母所撫育其母平生恆習讀內典精勤苦行以貞觀二十一年亡善經哀毀過禮哭聲不輟至明年善經恍忽之間見其母曰我為生時修福得受男身今生於此縣南石趙村宋家汝欲相見可即至彼也言終不見善經如言而往不移時而至彼於是日宋家生男善經因奉衣物具言由委此男見在善經恆以母禮事之相州滄陽縣智力寺僧元高俗姓趙氏其兄子先身於同村馬家為兒馬家兒至貞觀未死臨死之際願謂母曰兒於趙宗家有宿因緣死後當與宗為孫宗即與其同村也其母弗信乃以墨點兒左肋作一大黑子趙家妻又夢此兒來云當與孃為息因而有娠夢中所見宛然馬家之子產訖驗其黑子還在舊處

及兒年三歲無人導引乃自向馬家云此是兒舊舍也

本事詩開元中有幽州牙將姓張者妻孔氏生五子不幸去世復娶妻李氏悍怒很戾處遇五子日鞭箠之五子不堪其苦哭於母墓母忽於塚中出撫其子悲慟久之因以白布巾題詩贈張曰不忿成故人掩涕每盈巾死生今有隔相見永無因匣裏殘粧粉留將與後人黃泉無用處恨作塚中塵有意懷男女無情亦任君欲知腸斷處明月照孤墳五子得詩以呈其父其父慟哭訴於連帥帥上聞救李氏杖一百流嶺南張停所職

虎奮晉義熙四年東陽郡太末縣吳道宗少失父與母居未娶婦一日道宗他適鄰人聞屋中碎磕之聲闖不見其母但有烏斑虎在屋中鄰人恐虎食道宗母遽鳴鼓會里人共救之圍宅突進不見有虎但見其母語如平常不解其意兒還母語之曰冥罪見追當有變化事後一月忽失母縣界內虎災屢起皆云烏斑虎百姓患之發卒格之殺數人後人射虎箭當膺并戟刺中其腹然不能即死經數日後虎還其家故牀上不能復人形伏牀上而死其兒號泣如葬其母法焉朝夕以哭臨之

法苑珠林昔有一女置兒在地緣行他處時有一狼將其兒去其母見已越而語言汝狼何以將我兒去狼即報言汝是我怨會於五百生中嘗食我兒我今還欲於五百生殺害汝于此乃冤讎相報理法當爾何以生瞋作是報已復更語言若汝能捨怨害者我則放汝之子兒母報曰我捨怨心時狼即便起坐思

惟觀彼女人之心仍知不捨還復語言汝雖口言心猶不捨作是語已即便斷其兒命而去此乃自識宿命亦知於彼女人之心此為良驗

佛告比丘乃往過去無量世中有佛出世號曰帝幢將諸比丘遊行教化時有長者名曰瞿彌見佛及僧深生信敬請求供養日日如是便經父亡母故惠施子恡不聽乃至計食與母母故分減施佛及僧子聞瞋恚即便捉母閉著空室鏤戶棄去至七日頭母極飢困從子索食兒答母曰何如餐沙飲水足活今者何為索食語已捨去竟不得食母便去世其子命終入阿鼻獄受苦畢已還生人中飢困如是然由往昔供養佛故今得值我出家得道比丘聞已歡喜奉行又新婆沙論云昔有暴惡者令母執器自殺牛乳穀便過量母止之言餘者可留以乳犢子其人既聞忽生瞋忿以手掬乳散其母面墮著母身乳滴多少惡業力故即令彼人身上還生爾所白癩

譬喻經云昔有母子三人常作三事一作大船置於河中以渡百姓二於都市造立好井以供萬民三於四門各作園廁給人便利緣是功德命終之後皆生天上受福自然下生人中富貴長壽所生之處不經三塗

如智度論云菩薩有二夫人一名劬毗耶是王女不孕二名耶輸陀羅菩薩出家夜有人言太子出家何得有娠汚辱我門釋種欲以火坑焚燒母子耶輸自恨無事立大誓言我若邪行其腹內兒願母子隨火消化耶輸發此願已即投火坑於是火滅母子俱存火變蓮池母處花座知實不虛後生兒似菩薩身父

王大喜作百味歡喜丸奉佛佛變五百比丘皆如佛身羅睺持丸與佛鉢中方驗不虛

六度集經云昔者菩薩身為鵲鳥生子有三時國大旱無以食之自裂腋下肉以濟其命三子疑曰斯肉氣味與母身氣相似無異得無吾母以身肉飼吾等乎三子惶然有悲猛之情又曰寧煩吾命不損母體也於是閉口不食母親不食而更索焉天神歎曰母慈惠難喻子孝希有也諸天祐之願即從心佛告諸比丘鵲母者吾身是也三子者舍利佛目連阿難是也菩薩慈惠度無極行布施如是

雜寶藏經云佛言我於過去久遠世時生波羅奈國為長者子字慈童女其父早喪與母共居家貧賈薪日得兩錢奉養於母方計轉勝日得四錢以供於母遂復漸差日得八錢供養於母後人投趨獲利轉多日一十六錢奉給於母眾人見其聰明福德皆來勸之入海採寶聞已白母母見慈孝謂不能去戲語之言聽汝入海兒即結伴竟日已定辭去母即抱兒啼哭而言不待我死何由得去兒已許他惡負言信便自掣出絕母頭髮傷數十根遂去入海多得寶還至於中路徒伴在前童女獨後失伴錯道到一山上見瑠璃城飢渴往趨有四玉女擎四如意珠作唱伎樂出城來迎四萬歲中受大快樂復生厭心捨之而去見頗梨城有八玉女擎八如意珠作樂來迎八萬歲中極大歡喜後厭捨去至白銀城有十六玉女擎十六如意珠如前來迎十六萬歲受大快樂後復捨去至黃金城有三十二玉女擎三十二如意珠如前來迎三十二萬歲受大快樂後厭捨去到一鐵城入見

一人頭戴火輪捨著童女頭上而去時慈童女即問獄卒我戴此輪何時可脫獄卒答言世間有人作罪福業如入海經歷諸城然後當來代汝受罪若無代者終不墮地復問我昔作何罪福獄卒答言汝昔兩錢供養母故得琉璃城四如意珠四玉女四萬歲中受諸快樂四錢供母得頗梨城八如意珠及八玉女八萬歲中受諸快樂八錢供母得白銀城十六如意珠十六玉女十六萬歲中受諸快樂十六錢供養母故得黃金城有三十二如意珠三十二玉女三十二萬歲受大快樂以絕母髮今得鐵城火輪之報有人代汝乃可得脫復問獄卒今此獄中頗有受罪如我比不答言無量不可稱計聞已念言我會不免願使一切應受苦者盡集我身作是念已鐵輪即墮獄卒見已鐵叉打頭尋即命終生兜率天

昔迦默國鳩鵲扇村中有一老母唯有一子其子悖逆不修仁孝以瞋母故舉手向母適打一下即日出行遇逢於賊折其一臂

昔有一婦稟性很戾不順禮度每所云為常與姑反後作方計教其夫主自殺其母其夫愚疑即用婦語便將其母至曠野中結縛手足將欲加害罪逆之甚感徹上天雲霧四合為下霹靂霹殺其兒母即還家其婦開門謂是夫主問言殺未姑答已殺至於明日方知夫死

佛告諸比丘過去久遠無量世時波羅奈國中有山名曰仙山有梵志在彼山住大小便利於石上後有精氣墮小行處有雌鹿來舐即便有身日月滿足來至仙人所生一女子端正殊妙唯脚似鹿梵志取之

養育長成時梵豫國王出行遊獵見其端正甚適悅意即從梵志求索此女梵志與王王即立為第二夫人後時有身相師占言當生千子王大夫夫人聞已生妒漸作計較恩厚招喻鹿女左右多與財寶日月滿足便生千葉蓮花欲生之時大夫夫人以物縵眼不聽自看捉臭爛馬肺承著其下取千葉蓮花盛著籃裏擲於河中還為解眼而語之言看汝所生唯見一段臭爛馬肺王遣人問為生何物而答王言唯生臭肺大夫夫人而語王言王喜倒惑此畜生所生仙人供養生此不祥臭穢之物王大夫夫人即便退其夫人之職不復聽見時鳥者延王將諸徒眾從夫人嫁女下流遊戲見黃雲蓋從河上流隨水而來王作是念此雲蓋下必有神物遣人往看於黃雲下見有一籃即便接取開而看之見千葉蓮花葉葉有一小兒取之養育以漸長大各有大力鳥者延王歲常貢獻梵豫王集諸獻物遣使欲去諸子問言欲作何等時王答言欲貢獻彼梵豫國王諸子各言若有一子猶望能伏天下使來貢獻凡有千子而當獻他千子即時將軍眾降伏諸國次到梵豫國王聞軍至募其國中誰能攘却如此之敵都無有人能攘却者第二夫人來受募言我能却之問言云何得却夫人答言但為我作百丈之臺我坐其上必能攘却作臺已竟夫人在上而坐爾時千子欲舉弓射自然手不能舉夫人語言汝慎莫舉手向父母我是汝母千子聞言何以為驗母答子言我若構乳一乳有五百岐各入汝口是汝之母若當不爾非是汝母即時兩手構乳一乳之中有五百岐入千子口中其餘眾無有得者千子降

伏向父母懺悔諸子於是和合二國無復怨讎自相勸率以五百子與親父母以五百子與養父母時二國王分閭浮提各畜五百子諸比丘白佛言此女有何因緣生鹿腹中佛言此女過去世時生貧賤家母子二人田中鋤穀見一辟支佛持鉢乞食母語女言我欲家中取我食分與是快士女言亦取我分并與母即歸家取母子二人食分來與辟支佛女怪母運上一高處遙望其母已見其母而語母言何不疾鹿驟而來母既至已嫌母遲故尋作恨言我生在母邊不如鹿邊生也母即以二分食與辟支佛餘殘母子共食辟支佛食訖擲鉢著空作十八變時母歡喜即發誓願使我將來恆生聖子如今聖人以是業緣後生五百子皆得辟支佛一作養母一作所生母以與母鹿驟故生鹿腹中脚似鹿甲其母後身作梵豫王其女後身作蓮花夫人由是業緣後生賢劫千聖以誓願力常生賢聖

指月錄洪州百丈山懷海禪師福州長樂人王氏子兒時隨母入寺拜佛指佛像問母曰此為誰母曰佛也師曰形容與人無異我後亦當作佛

五祖弘忍大師者廬州黃梅人也先為破頭山中栽松道者嘗請於四祖曰法道可得聞乎祖曰汝已老脫有聞其能廣化耶儻若再來吾尚可遲汝乃去行水邊見一女子浣衣揖曰寄宿得否女曰我有父兄可往求之曰諾我即敢行女首肯之即回策而去女周氏季子也歸輒孕父母大惡逐之女無所歸日備紡里中夕止於衆館之下已而生一子以為不祥因拋濁港中明日見之派流而上氣體鮮明大驚遂舉

之成童隨母乞食里人呼爲無姓兒逢一智者歎曰此子缺七種相不逮如來後遇信大師得法嗣化於破頭山

驚魔羅尊者未出家時外道受教爲嬌尸迦欲登王位用千人指爲花冠已得九百九十九唯欠一指遂欲殺母取指時佛在靈山以天眼觀之乃作沙門在驚魔前驚魔遂釋母欲殺佛佛徐行驚魔急行追之不及乃喚曰瞿曇住住佛告曰我住久矣是汝不住驚魔聞之心忽開悟遂棄刀投佛出家

虞初新志徐芳神鉞記庚辰夏某鄉有不孝子王某父早喪僅一老母婢畜之每晨擁妻酣睡而役母使炊俟熟乃起且如是小不如意即恣口詈罵生一子甫數月母抱之視釜沸候兒忽騰跳墮釜中母知不救即潛竄不孝子聞兒叫起視已死乃大恨曰媼殺我子捫廚得刀遂出離家百武有關帝廟母見不孝子至閃入廟伏神座下不孝子燃刀入忽帝傍周將軍像從座躍下提刀砍不孝子倒正中其項廟祝聞刀聲鏗然移出則不孝子流血滿地而周將軍一足尚在門限外未入呼問老母具述其事蓋幾不免而神救之也自是遠近喧傳其廟周將軍靈爽競以金重裝其像足仍門外如故信州居民近是鄉者曰裏糧走謁

海寧陸冰修述閩中高雲客之言曰其鄉有鬼孝子者生七八歲父亡於外家無宿糧孝子即能以力養其母俾母安其室而無他志將來冠聘某氏未及娶孝子忽以疾死自是母無所依有鄉人某者將娶之謂媒者曰若之夫久相失矣若之子又卒亡矣若之

家無三尺之童且無衣無食矣若其何以自終乎予欲與若偕老若其許之乎媒者悉以告其母母將許之孝子是夜忽聲作於室嗚嗚然環榻而告母曰兒雖死兒心未死也兒與母形相隔魂相依也鄰人欲奪吾母母遂將從之乎母驚哭曰失身豈吾素志始汝父死賴有汝汝死吾復何賴汝爲我謀我何以生孝子曰兒之生會以力養吾母亦會以餘力聘某氏女兒不幸早喪母無所依某當歸吾聘資爲母生計母曰如不應何孝子曰兒當語之是夜果見異於某家某倍償前貲以歸其母母以是自給三年許資盡母復呼孝子魂而告之孝子曰兒生能以力養吾母死亦能以力養吾母母曰吾兒鬼矣烏能復以力養孝子曰母當市中語擔者曰爾倍平日所擔吾兒當佐汝母果入市語擔者曰若兒死矣烏能佐吾擔其母曰請試之擔者果增以倍孝子陰佐之擔者疾走如平日因以所獲錢穀歸半於其母孝子曰佐之無間母以是自給至老

國初戊戌進士湯陽爲諸生時家貧奉母忽病死鬼卒拘至東嶽聘哀籲曰老母在堂無人侍養望帝憐之嶽帝曰汝命止此冥法森嚴難徇汝意聘板案哀號帝曰既是儒家弟子送孔聖人裁奪鬼卒押至宣聖處曰生死隸東嶽功名隸文昌我不與焉回遇大士哀訴求生大士曰孝思也盡允之以警世鬼卒曰彼死數日屍腐奈何大士命善財取牟尼泥完其屍善財取泥若梅檀香同至其家屍果腐爛一燈熒然老母垂涕死七日尚無以殮善財以泥團屍臭穢頓息遂有生氣魂歸其中身即蠕動張目見母嗚咽不

禁母驚狂叫鄰人咸集聘曰母勿怖男再生矣備言再生之故男本無功名命限已盡求報親恩大士命男持戒許男成進士但命無祿位戒以勿仕後聘及第長齋繡佛事母而已迨母死就真定令卒於官豈違勿仕之戒歟

鬼母者某賈人妻也同賈人客某所既姪暴殞以長路迢遠暫瘞隙地未迎歸適肆有鬻餅者每聞雞起即見一婦人把錢俟輕步纖音意態皇皇蓋無日不與星月伴者店人問故婦人愴然曰吾夫去身單又無乳每饑兒啼夜輒中心如劍母子恩深故不避行露急持啖兒耳店人初聆言亦不甚疑但晝投錢於笥中必獲紙錢一疑焉或曰是鬼物無疑夫紙熱於火者入水必浮其體輕也明且盍取所持錢悉而投水甕伺其浮者物色之店人如言獨婦錢浮耳怪而蹤跡其後飄飄颺颺迅若飛鳥忽近小塚數十步奄然沒店人毛髮森豎喘不續吁亟走鳴之官起柩視衣骨燼矣獨見兒生兒初見人時猶手持餅啖了無怖畏及觀者蜩集語嘈然方驚啼或左顧作投懷狀或右顧作攀衣勢益蒼鬱認死母爲生母而呱呱若覓所依也傷哉兒乎人苦別生兒苦別死官憐之急覓乳母飼馳名其父父到撫兒哭曰似而母是夜兒夢中趨趨咿喔不成寐若有人嗚嗚抱持者明旦視兒衣半濡宛然未燥訣浪也父傷感不已攜兒歸後兒長貿易江湖間言笑飲食與人不異惟性輕跳能於平地躍起若凌虛然說者猶謂得幽氣云兒孝或詢幽產始末則走號曠野目盡腫